

# KUMPULAN CERITA RAKYAT SARAWAK

## KISAH RUHUNG

### Jiso Rutan

Ruhung pergi menemani ayah dan ibunya merumput di huma. Ketika mereka sedang merumput, Ruhung terjumpa bangkai seekor anak pelanduk yang baru mati. Ruhung bercadang hendak mengambilnya.

“Jangan kamu ambil! Itu tentu bekas makanan harimau,” kata ibu Ruhung.

“Bekas harimaukah, bekas beruangkah, saya tak peduli, bu. Saya nak bawa balik, dapat dimakan. Kalaupun saya bertukar jadi harimau atau beruang, saya pun tak kisah,” kata Ruhung bersahaja.

“Kalau kamu jadi harimau, siapa yang akan melindungi kami daripada penyamun? Siapa yang kenal kami? Kami dah tua,” kata ibu Ruhung.

“Kalaulah saya ditakdirkan jadi harimau, sayalah yang akan menjaga ayah dan ibu. Ayah dan ibu jangan susah. Kalau ada penyamun datang, teruskan saja kerja ayah dan ibu itu. Jangan bimbang. Saya akan melindungi ayah dan ibu,” kata Ruhung dengan yakin.

“Kalau begitu katamu, baik juga. Kamu bersembunyi saja di balik batang kayu itu. Kalau penyamun datang hendak memotong kepala kami, cepat-cepatlah kamu bertindak,” kata ayah Ruhung.

“Baik, saya berjanji akan melindungi ayah dan ibu berdua,” jawab Ruhung.

Kira-kira tiga hari kemudian, semasa ayah dan ibu Ruhung sedang merumput seperti biasa, penyamun pun sampai ke situ. Ketika penyamun itu sedang bersedia untuk memenggal kepala ibunya, Ruhung yang sedang bersembunyi dekat situ terus menerkam dan mencantas leher penyamun itu dari belakang dengan parang tajam. Penyamun itu pun terus rebah mati di situ.

Ruhung kemudian membawa kepala yang sudah berceraikan dari badan penyamun ke sungai yang berdekatan untuk dicuci. Selepas dicuci kepala itu disimpan ke dalam perut

perahu dan ditudungkan dengan kajang. Ruhung kemudian pun berkayuh pulang membawa kepala tersebut.

Malam itu ibu bapa Ruhung memberitahu Ketua Kampung dan semua penduduk di situ bahawa Ruhung telah memotong kepala seorang penyamun. Mula-mulanya mereka tidak mahu percaya dengan cerita orang tua Ruhung itu. “Mana mungkin budak seperti Ruhung dapat membunuh penyamun. Orang yang handal-handal pun sukar berbuat demikian,” kata mereka. Setelah mereka dibawa untuk menyaksikan kepala penyamun yang disembunyikan di dalam perahu Ruhung barulah mereka percaya dan kagum dengan kehebatan anak muda itu.

Orang kampung kemudian membuat persiapan untuk upacara menyambut ‘kedatangan’ tengkorak musuh ke rumah panjang mereka. Pelbagai juadah dan hidangan disediakan untuk upacara tersebut. Sementara itu tengkorak penyamun itu digantung di rumah *pangah* atau rumah tengkorak.

Dalam upacara itu Ruhung telah diperlakukan seperti seorang wira dan pahlawan perkasa. Badannya dihias dengan pakaian dan perhiasan cantik. Gadis-gadis cantik datang dan duduk di sebelah-menyebelah Ruhung. “Sebagai hadiah, kamu boleh pilih salah seorang untuk dijadikan isteri,” kata Ketua Kampung. Ruhung hanya tersenyum.

“Wahai penduduk kampung sekalian. Mulai sekarang saya akan bertanggungjawab untuk menjaga keselamatan kamu semua. Kamu jangan takut. Sayalah harimau jadian yang akan sentiasa berkeliaran di kampung ini untuk melindungi kamu. Kamu yang buta, yang cacat, yang patah tulang dan seumpamanya juga boleh datang kepada saya. Saya akan cuba sembuhkan. Jangan kamu takut turun ke huma kerana takut pada penyamun. Saya akan ada bersama meskipun jasad saya tidak kelihatan. Sayalah Panglima Ruhung,” kata Ruhung dengan panjang lebar.

Sejak hari itu, berita tentang keberanian dan keistimewaan Ruhung mula tersebar luas sehingga ke kampung-kampung lain. “Ah! Budak mentah, nak tunjuk lagak konon,” kata Apai Limau apabila berita itu sampai ke telinga. “Kunang Apai adalah ketua penyamun yang sangat kejam. Saya nak tengok sendiri sejauh mana kehebatan budak mentah itu,” tambahnya.

Kunang Apai Limau kemudian mengumpul pengikutnya dan berkayuh ke perkampungan Ruhung. Kira-kira enam hari mereka berkayuh barulah mereka sampai.

Dengan ilmu yang luar biasa yang ada pada dirinya Ruhung dapat merasa akan kedatangan Kunang Apai Limau dan pengikutnya itu. Dia pun segera memanggil anak buahnya dan meminta mereka supaya memasang jaring yang kuat lagi besar sebagai perangkap di tebing sungai sebelum rombongan musuh itu sampai. Apabila jaring itu sudah siap dipasang, mereka pun berkawal di situ.

Menjelang subuh pagi esoknya, rombongan musuh yang terdiri daripada tiga buah perahu panjang pun sampai dan berhenti di tebing sungai. Ketika mereka hendak menaiki tebing itu, Ruhung dan pengikutnya segera menerbarkan jaring perangkap. Dengan demikian rombongan penyamun itu terperangkap di dalam jaring tersebut. Serentak dengan itu juga Ruhung dan orangnya terus menyerang dan membunuh mereka termasuk Kunang Apai Limau sendiri.

Selepas membunuh penyamun-penyamun itu, Ruhung dan pengikutnya memenggal kepala mereka pula. Kepala itu kemudian dibawa pulang. Selepas selesai mengadakan upacara untuk menyambut kedatangan kepala-kepala musuh itu, Ruhung dilantik menjadi Ketua Kampung bagi menggantikan Ketua Kampung lama yang sudah tua. Sejak hari itu, penduduk di kampung tersebut hidup aman damai di bawah jagaan Ketua Kampung mereka yang gagah perkasa itu.

Sumber: *Kumpulan Cerita Rakyat Sarawak : Kisah Si Sidur*

**Dewan Bahasa dan Pustaka Cawangan Sarawak**

